

PENGLIBATAN MAHASISWA MELAYU UNIVERSITI AWAM DALAM POLITIK DI MALAYSIA

MAZLI MAMAT, ABDUL RAZAK ABDUL RAHMAN & ABDUL RASHID ABDULLAH

ABSTRAK

Artikel ini membincangkan mengenai penglibatan mahasiswa Melayu di Universiti Awam sekitar Lembah Kelang dalam politik di Malaysia. Penglibatan ini memberi fokus terhadap kehadiran mahasiswa dalam aktiviti anjuran parti politik seperti ceramah, dialog, forum, kempen dan mesyuarat parti politik. Kajian ini menggunakan kaedah tinjauan menggunakan pendekatan kuantitatif dan pengumpulan data melalui soal selidik. Sampel kajian melibatkan seramai 441 orang responden dari empat buah universiti terpilih. Penemuan mendapati tahap penglibatan mahasiswa Melayu Universiti Awam sekitar Lembah Kelang dalam politik berada pada tahap rendah. Hal ini menunjukkan bahawa mahasiswa Melayu kurang mendapat pendedahan tentang politik walaupun larangan terhadap penglibatan dalam politik telah ditarik balik melalui pindaan Seksyen 15 AUKU tahun 2012.

Kata Kunci: Pilihan raya, Parti Politik, Penglibatan, Mahasiswa, AUKU

ABSTRACT

This article discusses the political involvement of Malay students at public universities in Kelang Valley which focuses on students' attendance to various types of activities organized by political parties such as lectures, dialogues, forums, campaigns and party meetings. This study used a survey method to collect the intended data. , The samples involved 441 respondents from four selected universities. The research findings show a lower level of students' involvement and participation in politics. The findings also elicited that Malay students are less exposed to politics despite a ban on participation in politics has been withdrawn by amending Section 15 of the UUCA in 2012.

Keywords: Election, Political Party, Involvement, Students, UUCA

PENGENALAN

Sejarah telah membuktikan bahawa mahasiswa turut memainkan peranan dan memberi sumbangan penting dalam menuntut kemerdekaan Tanah Melayu daripada penjajah British (Muhamad Ali Embi, 2009). Penglibatan Mahasiswa Universiti Awam dalam politik Malaysia sangat aktif sekitar tahun 60-an hingga 70-an disebabkan tidak ada undang-undang khusus yang melarang mahasiswa untuk terlibat dalam politik. Dalam pilihan raya umum tahun 1969 misalnya, mahasiswa telah mengadakan ceramah dan menghasilkan manifesto mereka sendiri dalam

pilihan raya tersebut sehingga menyebabkan Parti Perikatan mengalami kemerosotan sokongan (Junaidi Abu Bakar, 1993). Mahasiswa juga tidak hanya memperjuangkan isu mengenai mahasiswa sahaja, malah turut terlibat dalam memperjuangkan isu antarabangsa seperti mengadakan demonstrasi membantah tindakan Amerika Syarikat mengebom Hanoi dan Haipong, Vietnam (Mohammad Abu Bakar, 1973). Aktiviti mahasiswa menjadi semakin agresif apabila wujudnya sudut pidato yang menjadi tempat mahasiswa menyampaikan idea dan pendapat mengenai isu-isu semasa (Mohd Shuhaimi, 1995). Penglibatan awal mahasiswa dalam politik pada era 60-an banyak dipengaruhi oleh elemen sosialis yang meresap masuk dalam persatuan mahasiswa sehingga wujud kesedaran dan sikap prihatin mahasiswa tentang isu-isu semasa yang berlaku di sekeliling mereka. Suara dari kampus ini, merupakan ledakan keinginan yang mahu melihat perubahan ke arah menjadikan Malaysia yang lebih baik, adil dan demokratik. Namun begitu, suara-suara tersebut telah menimbulkan perasaan kurang senang golongan establishment menyebabkan kegiatan aktivis mahasiswa menjadi kontroversi sehingga terbentuknya Akta Universiti Kolej Universiti (AUKU) 1971. Ekoran penguatkuasaan AUKU, aktiviti mahasiswa semakin lemah terutama selepas pindaan AUKU tahun 1975 yang melarang mahasiswa terlibat dalam politik. Namun begitu, setelah larangan tersebut berkuat kuasa selama 37 tahun, kerajaan telah menarik balik larangan tersebut pada 19 April 2012 melalui pindaan Seksyen 15 AUKU. Pindaan tersebut telah membenarkan kembali mahasiswa untuk terlibat dalam politik. Pada masa ini aktivis mahasiswa yang aktif dalam politik seperti Adam Adli, Safwan Anang dan Fahmi Zainol. Penglibatan mahasiswa dapat dilihat melalui kehadiran dalam aktiviti anjuran parti politik seperti dialog, ceramah, demonstrasi, penyerahan memorandum, rapat umum, kempen pilihan raya dan sebagainya. Apa yang menjadi persoalannya, pada tahap mana mahasiswa Melayu Universiti Awam ini terlibat dalam politik di Malaysia. Oleh itu, adalah menjadi tujuan artikel ini untuk mengukur tahap penglibatan mahasiswa Melayu Universiti Awam dalam politik kepartian di Malaysia berasaskan kekerapan mereka menghadiri aktiviti anjuran parti politik.

ULASAN KAJIAN LEPAS

Pada masa ini, kajian tentang penglibatan mahasiswa dalam politik Malaysia agak terhad berbanding kajian politik lain. Salah satu kajian terkini mengenai penglibatan mahasiswa dalam politik Malaysia adalah kajian oleh Fauzi dan Ku Hasnita (2015). Kajian ini memberi fokus kepada kebangkitan semula gerakan mahasiswa di Malaysia dalam pilihan raya umum 2013. Setelah AUKU dikuatkuasakan, gerakan mahasiswa semakin merosot dan lemah. Namun begitu gerakan mahasiswa mendapat nafas baru apabila AUKU dipinda pada tahun 2012 sehingga membuka jalan kepada mahasiswa untuk terlibat secara aktif dalam pilihan raya umum 2013. Secara umumnya gerakan mahasiswa di Malaysia bukan bertujuan untuk mendapatkan kuasa politik tetapi lebih kepada mendapatkan semula kuasa autonomi universiti yang hilang semenjak AUKU dikuatkuasakan. Berbeza dengan kajian oleh Sivamurugan (2014) yang memfokuskan kepada kelakuan mengundi mahasiswa

dalam pilihan raya umum berdasarkan persepsi dan kepimpinan parti politik. Apa yang menariknya, kajian ini dapat membuktikan bahawa media arus perdana telah menjadi kurang penting kepada mahasiswa berbanding media alternatif seperti media sosial untuk memperoleh sumber maklumat politik. Selain itu, mahasiswa juga turut menyuarakan perasaan tidak puas hati terhadap usaha Barisan Nasional dalam menangani rasuah kerana bagi mahasiswa usaha kerajaan masih belum menampakkan hasilnya dalam memerangi rasuah. Manakala dari sudut kepimpinan parti politik, hasil kajian mendapati mahasiswa sangat tertarik kepada kepimpinan melalui tauladan dan pemimpin yang mempunyai sifat jujur, beretika, berilmu dan berwibawa yang menjadi pilihan mahasiswa.

Kajian oleh Mohd Fuad et al. (2012) pula memberi penekanan kepada pelbagai perkara penting tentang mahasiswa India menjelang pilihan raya umum 2013 seperti sumber maklumat politik, pandangan tentang politik Malaysia, ciri-ciri parti politik yang disokong dan persepsi terhadap politik. Apa yang menarik, kajian ini membuktikan bahawa mahasiswa India masih bersifat pro establishment walaupun dalam pilihan raya umum 2008 Malaysian Indian Congress (MIC) mengalami kemerosotan sehingga dianggap tidak lagi relevan menjadi parti mewakili kaum India. Namun begitu, kajian ini hanya memberi penumpuan kepada belia India sahaja dan tidak melibatkan semua kaum seperti Melayu, Cina, bumiputera Sabah dan Sarawak sedangkan kaum-kaum ini merupakan penyumbang kepada jumlah undi dalam pilihan raya umum di Malaysia.

Sementara kajian oleh Thock (2012) memberi tumpuan khusus kepada aktivis mahasiswa Cina. Kajian ini mendapati aktivis mahasiswa Cina dipengaruhi oleh gerakan reformasi yang dibawa oleh Anwar Ibrahim. Gerakan aktivisme mahasiswa Cina memfokuskan kepada keadilan dan perubahan masyarakat Malaysia. Namun begitu, gerakan ini dihalang oleh pihak pentadbir universiti melalui AUKU. Mahasiswa menganggap AUKU sebagai zalim dan menyekat kebebasan idealisme sehingga menimbulkan perasaan tidak puas hati terhadap pemerintah. Selepas tamat pengajian, mahasiswa ini telah mengambil keputusan menggunakan platform Non-Government Organization (NGO) dan Pakatan Rakyat bagi meneruskan agenda perjuangan mereka. Hasilnya Pakatan Rakyat menjadi pilihan golongan muda yang berpendidikan tinggi dan dalam pilihan raya umum 2008, sebilangan daripada bekas aktivis ini telah berjaya menjadi Ahli Dewan Undangan Negeri atau Ahli Parlimen atas tiket Pakatan Rakyat.

Manakala kajian oleh Ridhuan Tee (2008) memberi tumpuan kepada persepsi mahasiswa Cina terhadap United Malays National Organization (UMNO). Apa yang menarik kajian ini melibatkan responden dari Institut Pengajian Tinggi Awam dan Institut Pengajian Tinggi Swasta. Kajian ini turut menggunakan dua kaedah iaitu, Kuantitatif dan Kualitatif yang dapat memberi nilai tambah kepada penemuan kajian. Walau bagaimanapun kajian ini hanya melibatkan mahasiswa Cina dan tidak melibatkan mahasiswa dari etnik yang lain. Berlainan dengan kajian oleh Muhamad Ali dan Ahmad Faiz (2005) yang mengupas tentang kepercayaan

mahasiswa terhadap kerajaan. Kajian ini telah merungkaikan tentang beberapa persoalan penting seperti persepsi mahasiswa tentang politik mengikut pecahan jantina, tahun pengajian, bangsa, latar belakang pendidikan, jurusan pengajian dan sebagainya. Apa yang menariknya dalam kajian ini melibatkan responden dari pelbagai etnik dari universiti utama di Malaysia. Sementara Mohd Nasir (2008) pula memberi fokus kepada persepsi mahasiswa terhadap pilihan raya umum 2008. Kajian ini menganalisis tentang kepentingan mengundi, mendaftar sebagai pengundi, kesan keputusan pilihan raya umum terhadap kehidupan seharian dan minat terhadap politik. Selain itu, aspek penerimaan mahasiswa terhadap setiap individu, tanpa mengira latar belakang etnik, layak untuk menjadi Perdana Menteri Malaysia turut diberi perhatian dalam kajian ini. Namun begitu, responden kajian ini tidak diambil dari kalangan mahasiswa di universiti yang diketahui aktif dalam politik seperti mahasiswa Universiti Malaya dan Universiti Kebangsaan Malaysia.

Zainah Anwar (1990) pula dalam kajiannya memberi penumpuan terhadap kebangkitan Islam di kalangan mahasiswa tajaan kerajaan yang menuntut di England pada tahun 1970-an. Apa yang menarik kajian ini dari sudut politik mendapati kebangkitan Islam telah memberi kesan negatif kepada masyarakat sehingga wujud labelling iaitu, Parti Islam Se-Malaysia mewakili Melayu Islam dan United Malays National Organization mewakili Melayu sekular. Kajian Junaidi Abu Bakar (1993) pula memberi fokus tentang mahasiswa politik dan AUKU. Kajian ini menganalisis pelbagai perkara penting mengenai AUKU seperti rasional pemerintah menggubal AUKU, kesan perlaksanaan akta ini terhadap kebebasan akademik, kesedaran dan sikap mahasiswa terhadap AUKU. Namun begitu, responden kajian hanya melibatkan mahasiswa Universiti Kebangsaan Malaysia dan tidak diperluaskan kepada mahasiswa di lain-lain universiti. Berdasarkan sorotan karya di atas, jelas wujud jurang yang ketara tentang tahap penglibatan mahasiswa Melayu dalam politik Malaysia. Justeru itu, kajian ini berusaha untuk mengisi ruang kosong dalam kajian-kajian sebelum ini.

METODOLOGI

Reka bentuk kajian dalam penyelidikan ini adalah tinjauan menggunakan borang soal selidik. Bagi meningkatkan nilai tambah kepada hasil kajian, pemerhatian tanpa turut serta turut dijalankan semasa pengumpulan data primer. Kajian ini melibatkan seramai 441 orang mahasiswa Melayu yang berumur 21 tahun dan ke atas dari empat buah universiti iaitu, Universiti Malaya, Universiti Kebangsaan Malaysia, Universiti Putra Malaysia dan Universiti Islam Antarabangsa Malaysia. Pemilihan responden dalam kajian ini dibuat secara pensampelan berstrata. Data yang diperoleh kemudiannya dianalisis secara deskriptif menggunakan Statistical Package for the Social Sciences (SPSS). Umumnya mahasiswa dari universiti ini dipilih disebabkan lokasi universiti yang terletak di sekitar Lembah Klang yang merupakan tempat paling maju serta pusat ekonomi dan pentadbiran (Malaysia, 2015). Universiti ini juga merupakan universiti yang sering menjadi perhatian parti-parti politik untuk mengukur tahap sokongan dan pengaruh terhadap parti masing-

masing. (Mohd Shuhaimi, 1995).

DAPATAN KAJIAN DAN PERBINCANGAN

Latar belakang demografi

Kajian ini dijalankan di empat buah Universiti Awam yang melibatkan seramai 441 orang responden iaitu, 223 orang (50.6%) lelaki dan 218 orang (49.4%) perempuan. Responden kajian ini terdiri daripada 144 orang (32.7%) beraliran sains dan 297 orang (67.3%) beraliran sains sosial. Responden ini terdiri daripada mahasiswa yang berumur antara 21 tahun sehingga 27 tahun yang sedang mengikuti pengajian di universiti-universiti seperti yang disebutkan di atas. Pecahan mengikut tempat dibesarkan, seramai 226 orang (51.2%) responden dibesarkan di bandar dan 215 orang (48.8%) dibesarkan di luar bandar terlibat dalam kajian ini. Kesemua responden adalah mahasiswa Melayu. Tujuan mahasiswa Melayu dipilih kerana etnik Melayu merupakan etnik yang paling tinggi menjadi majoriti di kawasan parliment pilihan raya berbanding lain-lain etnik. Di Semenanjung Malaysia, kawasan parliment yang mempunyai majoriti pengundi Melayu dalam pilihan raya umum 1999 sebanyak 98 kawasan (68.1%), berbanding 25 kawasan (17.4%) majoriti Cina dan 21 kawasan (14.6%) bercampur. Manakala dalam pilihan raya umum 2004, kawasan majoriti Melayu terus meningkat kepada 114 kawasan (68.7%), berbanding 24 kawasan (14.5%) majoriti Cina dan 28 (16.9%) kawasan bercampur. (Amer Saifude, 2009).

Keahlian parti politik

Keanggotaan dalam parti politik merupakan kriteria yang menunjukkan penglibatan secara langsung seseorang individu dalam parti politik. Keanggotaan dalam parti ini bererti seseorang individu itu menyokong satu-satu parti politik secara formal dan terbuka (Hussain Mohamed, 1974). Setiap ahli parti bukan sahaja memperoleh kad keahlian tetapi mempunyai kewajiban untuk membayar yuran dan menjalankan tanggungjawab sebagai seorang ahli parti seperti berkempen untuk memenangkan calon yang disokong dan menjadi jurucakap secara tidak langsung kepada parti tersebut. Kajian ini mendapati mahasiswa Melayu yang menjadi ahli parti politik adalah seramai 72 orang (16.3%) dan yang tidak menjadi ahli mana-mana parti politik adalah seramai 369 orang (83.7%). Ini menunjukkan bahawa majoriti mahasiswa Melayu tidak menjadi ahli mana-mana parti politik. Situasi ini berhubung rapat dengan penguatkuasaan AUKU yang melarang mahasiswa terlibat dalam politik. Walaupun larangan tersebut telah dimansuhkan dalam pindaan tahun 2012, namun masih kelihatan kesannya apabila keanggotaan dari kalangan mahasiswa dalam parti politik masih berada pada tahap yang rendah. Jadual 1, merupakan ringkasan daptan tentang keahlian parti politik dari kalangan mahasiswa Melayu.

Jadual 1. Keahlian parti politik mahasiswa Melayu

Keahlian Parti Politik	Peratus (%)
Ya	16.3%
Tidak	83.7%

Penglibatan dalam kegiatan politik

Berdasarkan dapatan kajian, didapati telah wujud kesedaran dalam diri mahasiswa tentang kepentingan mengundi dalam pilihan raya walaupun tidak begitu membanggakan. Hasil kajian menunjukkan seramai 233 orang (50.6%) mahasiswa Melayu telah mendaftar sebagai pengundi berbanding yang belum mendaftar seramai 218 orang (49.4%). Dapatan ini selari dengan dapatan Mohd Nasir (2008) yang menyatakan telah wujud kesedaran di kalangan mahasiswa tentang kepentingan menjadi pengundi dalam pilihan raya. Namun begitu jumlah ini masih belum mencukupi memandangkan kesemua responden telah berumur 21 tahun ke atas dan sepatutnya mereka ini telah mendaftar sebagai pengundi yang berdaftar. Manakala bagi mahasiswa yang pernah mengundi dalam pilihan raya, seramai 121 orang (27.4%) berbanding yang tidak pernah mengundi seramai 320 orang (72.6%). Dapatan ini jelas menunjukkan, walaupun mahasiswa ini telah mendaftar sebagai pengundi, tidak semestinya mereka akan keluar mengundi. Ini kerana wujud perbezaan yang ketara antara jumlah mahasiswa yang telah mendaftar dengan jumlah yang pernah mengundi dalam pilihan raya. Jadual 2, menunjukkan dapatan terhadap pendaftaran mengundi dan keluar mengundi bagi mahasiswa Melayu.

Jadual 2: Pendaftaran mengundi dan keluar mengundi

Penyataan	Ya	Tidak
Adakah anda telah mendaftar sebagai pengundi?	50.6%	49.4%
Adakah anda pernah mengundi dalam pilihanraya umum/kecil?	27.4%	72.6%

Kehadiran dalam program politik

Secara asasnya konsep penglibatan adalah luas dan berubah-ubah dari peringkat tidak terlibat secara langsung hingga menjadi ketua atau pemimpin parti politik. Secara mudahnya penglibatan seseorang itu boleh dibahagikan kepada dua iaitu, pasif dan aktif. Penglibatan pasif seperti menjadi pengundi pada waktu pilihan raya sahaja, manakala aktif pula menjadi ahli jawatankuasa sesebuah parti politik dan turut memberikan sumbangan secara langsung bagi kepentingan dan kegiatan yang dijalankan oleh parti berkenaan. Menurut Hussain Mohamed (1974), bentuk penglibatan politik seperti membuang undi dalam pilihan raya, menghadiri dan mengikuti rapat umum serta kempen politik merupakan penglibatan secara pasif. Manakala penglibatan secara aktif biasanya seseorang itu dalam kehidupan sehariannya sering berbincang hal-hal mengenai politik dan jika musim pilihan raya, berusaha menenangkan calon parti yang dianggotainya. Kajian ini memberi fokus kepada penglibatan mahasiswa Melayu dalam kegiatan politik melalui kekerapan menghadiri aktiviti anjuran parti politik seperti forum, kursus, mesyuarat, ceramah dan berkempen. Jadual 3 di bawah merupakan dapatan terhadap kekerapan mahasiswa menghadiri aktiviti politik.

Jadual 3: Kehadiran dalam aktiviti anjuran parti politik

Kehadiran	Tidak Pernah (%)	Jarang-Jarang (%)	Kerap (%)	Sangat Kerap (%)
Adakah anda pernah menghadiri forum/dialog politik?	29.5	42.9	23.3	4.3
Adakah anda pernah menghadiri kursus anjuran parti politik?	43.5	40.8	13.2	2.5
Adakah anda pernah menghadiri mesyuarat parti politik?	61.5	26.1	9.8	2.7
Adakah anda pernah menghadiri ceramah politik?	32.0	44.9	18.8	4.3
Adakah anda pernah menyertai kempen parti politik?	48.5	33.8	13.8	3.9

Secara umumnya, kesemua program yang dianjurkan oleh parti politik kurang mendapat sambutan. Analisis lanjut menggunakan selang kelas mendapati, peratusan mahasiswa Melayu yang berada pada tahap tinggi dalam menghadiri aktiviti anjuran parti politik adalah hanya 3.4%, berbanding tahap sederhana 22.9% dan tahap rendah sebanyak 73.7%. Dapatkan ini memberi gambaran bahawa mahasiswa Melayu masih mempunyai rasa takut untuk melibatkan diri dalam politik kesan penguatkuasaan AUKU, walaupun sekatan tersebut telah dimansuhkan pada 19 April 2012. Menurut Abdul Aziz Bari (2001), penguatkuasaan AUKU telah memberi kesan yang mendalam terhadap kehidupan mahasiswa, disebabkan itu, warga kampus tidak lagi bersama dengan masyarakat sepertimana sebelum AUKU diperkenalkan. Berdasarkan keputusan kajian, mahasiswa Universiti Awam sekarang ini tidak menganggap penglibatan dalam politik itu penting bagi mereka kerana mahasiswa lebih berminat menumpukan perhatian dalam akademik. Mahasiswa juga disifatkan sebagai kurang sensitif dalam memikirkan permasalahan anggota masyarakat tidak seperti mahasiswa terdahulu. Dapatkan ini turut menggambarkan bahawa golongan mahasiswa yang di label sebagai anti-establishment hanya bertindak sebagai suara minoriti dan tidak mencerminkan keseluruhan mahasiswa Melayu dalam kegiatan politik kepartian.

KESIMPULAN

Pilihan raya umum 2008 dan 2013 merupakan pilihan raya yang mana Barisan Nasional mendapat tentangan yang sengit daripada Pakatan Rakyat. Keputusan pilihan raya umum tersebut juga telah membuka mata ramai pihak tentang pentingnya mendapat sokongan daripada golongan muda. Menyedari hakikat ini, kerajaan telah meminda AUKU dengan menarik balik larangan terlibat dalam aktiviti politik. Walaupun kerajaan telah membenarkan mahasiswa terlibat secara langsung dalam politik, tetapi hasil kajian mendapati penglibatan dalam kegiatan politik masih rendah. Majoriti mahasiswa kurang melibatkan diri dalam program politik dan peratusan mahasiswa yang berdaftar sebagai pengundi juga pada tahap yang rendah. Justeru itu, adalah disyorkan agar pihak berwajib seperti pentadbir

universiti lebih memberi galakkan dan kesedaran kepada mahasiswa untuk terlibat dalam politik, misalnya dengan membenarkan mahasiswa melibatkan ahli politik dalam aktiviti anjuran mereka seperti mengadakan program penerangan isu-isu semasa, sesi dialog dan sebagainya tanpa sebarang sekatan dan syarat tertentu. Penglibatan mahasiswa dalam politik ini penting bertujuan sebagai latihan kepada mahasiswa untuk menjadi seorang pemimpin yang berwibawa kepada masyarakat dan negara pada masa depan.

RUJUKAN

- Abdul Aziz Bari. 2001. Peranan masyarakat universiti dalam menangani kegawatan ekonomi, sosial dan politik negara-satu perspektif undang-undang. Persidangan Sehari Persatuan Kakitangan Akademik dan Pentadbiran Universiti Sains Malaysia, Pulau Pinang.
- Amer Saifude Ghazali. 2009. Geografi Pilihan Raya Malaysia. Kuala Lumpur: Universiti Malaya.
- Hussain Mohamed. 1974. Masyarakat dan politik di Kampung Padang Luas Terengganu. satu kajian mengenai kehidupan politik dalam sebuah masyarakat Melayu kampung. Latihan Ilmiah. Universiti Malaya.
- Junaidi, Abu. Bakar. 1993. Mahasiswa politik dan undang-undang. Kuala Lumpur: Dewan Bahasa Dan Pustaka.
- Malaysia. 2015. Perbandingan bandar raya utama di Malaysia (Kuala Lumpur) dan China (Beijing) <http://smp.townplan.gov.my/?p=5488>. Diakses pada 7 June 2015.
- Mohd Fuad Mat Jali, Junaidi Awang Besar, Novel Lyndon, Viknesh a/l Ramachandran. 2012. Persepsi politik belia India Di Institusi Pengajian Tinggi Awam (IPTA) Malaysia. *Malaysia Journal of Society and Space*,(8), 1-11.
- Mohd Fauzi Fadzil., Ku Hasnita Ku Samsu. 2015. Student Activism and The 13th Malaysian General Election: The Second Civil Society Wave After 1969. *Pertanika Journal Social Sciences & Humanities*, 23 (1): 105 – 128.
- Mohd Nasir Ibrahim. 2008. Persepsi pelajar institusi pengajian tinggi IPT terhadap pilihan raya umum ke-12. Seminar Politik Malaysia. Shah Alam. 435-443.
- Mohd Ridhuan Tee Abdullah. 2008. Persepsi pelajar Cina di Institusi Pengajian Tinggi terhadap gerakan politik UMNO. Latihan Ilmiah. Universiti Putra Malaysia.
- Mohd Shuhaimi Al-Maniri. 1995. Politik kampus di sebalik tadbir. Selangor: Pustaka Generasi Baru.
- Muhamad Ali Embi. 2009. Patriotisme dan Kepercayaan Rakyat di Malaysia. Kuala Lumpur: Utusan Publications & Distributors.

- Muhamad Ali Embi., Ahmad Faiz Abd Hamid. 2005. Kepercayaan mahasiswa terhadap kerajaan. *Journal Demokrasi*,(IV), 77-91.
- Muhammad Abu Bakar. 1973. Mahasiswa menggugat. Kuala Lumpur: Pustaka Antara.
- Sivamurugan Pandian. 2014 University Students and Voting Behaviour in General Elections: Perceptions on Malaysian Political Parties Leadership. *Asian Social Science*, Vol. 10, 225-231.
- Thock Ker Pong. 2012. Aktivisme mahasiswa cina era reformasi dan pasca reformasi di malaysia: Kajian impak politik dalam pilihan raya umum ke-12. *Akademika*, 82(1), 91-102.
- Zainah Anwar. 1990. *Kebangkitan Islam di kalangan pelajar*. Selangor: IBS Buku

Profil Penulis:

Mazli Mamat

Calon Master (Politik dan Kerajaan)

Jabatan Pengajian Kenegaraan dan Ketamadunan

Fakulti Ekologi Manusia, Universiti Putra Malaysia

mazlimamat@gmail.com

Abdul Razak Abdul Rahman,Phd

Pensyarah Kanan

Jabatan Sains Kemasyarakatan dan Pembangunan

Fakulti Ekologi Manusia, Universiti Putra Malaysia

arazak@putra.upm.edu.my

Abdul Rashid Abdullah,Phd

Pensyarah Kanan

Jabatan Pengurusan dan Pemasaran

Fakulti Ekonomi, Universiti Putra Malaysia.

rashidabdullah@upm.edu.my